

କବି

ତାରାଶଙ୍କର ବନ୍ଦ୍ୟୋପାଧ୍ୟାୟ

ଦ୍ରଷ୍ଟବ୍ୟ

“এই খেদ মোর মনে,
ভালোবেসে মিটল না আশ, কুলাল না এ জীবনে ।
হায়! জীবন এত ছোট কেনে,
এ ভুবনে?”

শুধু দস্তুরমতো একটা বিস্ময়কর ঘটনাই নয়, রীতিমতো এক সংঘটন। চোর ডাকাত বংশের ছেলে হঠাৎ কবি হইয়া গেল।

নজির অবশ্য আছে বটে— দৈত্যকুলে প্রহ্লাদ। কিন্তু সেটা ভগবৎ-লীলার অঙ্গ। মুক্কে যিনি বাচালে পরিণত করেন, পক্ষু যাঁহার ইচ্ছায় গিরি লঙ্ঘন করিতে পারে, সেই পরমানন্দ মাধবের ইচ্ছায় দৈত্যকুলে প্রহ্লাদের জন্ম সম্ভবপর হইয়াছিল; রামায়ণের কবি বাল্মীকি ডাকাত ছিলেন বটে, তবে তিনি ছিলেন ব্রাহ্মণের ছেলে। সেও ভগবৎ-লীলা। কিন্তু কুখ্যাত অপরাধপ্রবণ ডোমবংশজাত সন্তানের অকস্মাৎ কবিরূপে আত্মপ্রকাশকে ভগবৎ-লীলা বলা যায় কি না সে বিষয়ে কোনো শাস্ত্রীয় নজির নাই। বলিতে গেলে গা ছমছম করে। সুতরাং এটাকে লোকে একটা বিস্ময় বলিয়াই মানিয়া লইল। এবং বিস্মিতও হইল।

গ্রামের ভদ্রজনেরা সত্যই বলিল— এ একটা বিস্ময়! রীতিমতো!

অশিক্ষিত হরিজনরা বলিল— নেতাইচরণ তাক লাগিয়ে দিলে রে বাবা!

যে বংশে নিতাইচরণের জন্ম, সে বংশটি হিন্দু সমাজের প্রায় পতিততম স্তরের অন্তর্গত ডোমবংশ, তবে শহর অঞ্চলে ডোম বলিতে যে স্তরকে বুঝায় ইহারা সে স্তরের নয়। এ ডোমেরা বাংলার বিখ্যাত লাঠিয়াল— প্রাচীনকাল হইতেই বাহুবলের জন্য ইহারা ইতিহাসবিখ্যাত। ইহাদের উপাধি হইল বীরবংশী। নবাবি পলটনে নাকি একদা বীরবংশীরা বীরত্বে বিখ্যাত ছিল কোম্পানির আমলে নবাবি আশ্রয়চ্যুত হইয়া দুর্ধর্ষ যুদ্ধব্যবসায়ীর দল পরিণত হয় ডাকাতে। পুলিশের ইতিহাস ডোমবংশের কীর্তিকলাপে পরিপূর্ণ। এই গ্রামের ডোম পরিবারগুলির প্রত্যেকের রক্তে রক্তে এখনও সেই ধারা প্রবাহিত। পুলিশ কঠিন বাঁধ দিয়াছে সে প্রবাহের মুখে— লোহা দিয়া বাঁধিয়াছে। হাতকড়ি, লোহার গরাদে দেওয়া ফটক, ডাভাবেড়ির লোহা প্রত্যক্ষ; এছাড়া ফৌজদারি দণ্ডবিধির আইনও লোহার আইন। কিন্তু তবু বাছিয়া বাছিয়া ছিদ্রপথে অথবা অন্তরদেশে ফল্লুধারার মতো নিঃশব্দে অধীর গতিতে আজও সে ধারা বহিয়া চলিয়াছে। নিতাইয়ের মামা গৌর বীরবংশী—

অথবা গৌর ডোম এ অঞ্চলে বিখ্যাত ডাকাত । এই বৎসরখানেক পূর্বেই সে পাঁচ বৎসর ‘কালাপানি’ অর্থাৎ আন্দামানে থাকিয়া দণ্ড ভোগ করিয়া বাড়ি ফিরিয়া আসিয়াছে ।

নিতাইয়ের মাতামহ— গৌরের বাপ শম্ভু বীরবংশী আন্দামানেই দেহ রাখিয়াছে । নিতাইয়ের বাপ ছিল সিঁদেল চোর । পিতামহ ছিল ঠ্যাঙাড়ে । নিজের জামাইকেই নাকি সে রাতের অন্ধকারে পথিক হিসাবে হত্যা করিয়াছিল । জামাইবাড়ির মাঠ এখন হইতে ক্রোশখানেক দূরে ।

ইহাদের উর্ধ্বতন পুরুষের ইতিহাস পুলিশ-রিপোর্টে আছে, সে এক ভীতিপ্রদ রক্তাক্ত ইতিহাস ।

এই নিতাইচরণ সে বংশের ছেলে । খুনির দৌহিত্র, ডাকাতির ভাগিনেয়, ঠ্যাঙাড়ের পৌত্র, সিঁদেল চোরের পুত্র— নিতাইয়ের চেহারা বংশের ছাপ স্পষ্ট ও প্রত্যক্ষ । দেহ কঠিন, পেশি দীর্ঘ সবল, রং কালো, রাত্রির অন্ধকারের মতো । শুধু বড় বড় চোখের দৃষ্টি তাহার বড় বিনীত এবং সে দৃষ্টির মধ্যে একটি স করুণ বিনয় আছে । সেই নিতাই অকস্মাৎ কবিরূপে আত্মপ্রকাশ করিল । লোকে সবিস্ময়ে তাহার দিকে ফিরিয়া চাহিল— নিতাই গৌরবের লজ্জায় অবনত হইয়া জোড়হাতে স করুণ দৃষ্টিতে মাটির দিকে চাহিয়া রহিল । তাহার সঙ্গে ঠোঁটের রেখায় ঈষৎ একটু লজ্জিত হাসি ।

ঘটনাটা এই—

এই গ্রামের প্রাচীন নাম অটুহাস— একাল্ল মহাপীঠের অন্যতম মহাপীঠ । মহাপীঠের অধিষ্ঠাত্রী দেবীর নাম মহাদেবী চামুণ্ডা । মাঘী পূর্ণিমায় চামুণ্ডার পূজা বিশিষ্ট একটি পর্ব; এই পর্ব উপলক্ষে এখানে মেলা বসিয়া থাকে । এই মেলায় চিরকাল জমজমাট কবিগানের পালা হয় । নোটনদাস ও মহাদেব পাল— দুইজনে এ অঞ্চলে খ্যাতনামা কবিয়াল, ইহাদের গান এখানে বাঁধা । এবার সেই প্রত্যাশায় অপরাহ্নে বেলা হইতেই লোকজন জমিতে শুরু করিয়া সন্ধ্যা নাগাদ বেশ একটি জনতায় পরিণত হইয়াছিল— প্রায় হাজার দেড় হাজার লোকের একটি সমাবেশ ।

সমারোহ করিয়া আসর পাতা হইয়াছিল, সন্ধ্যায় চারিদিকে চারিটা পেট্রোম্যাক্স আলো জ্বালা হইল, কবিয়ালদের মধ্যে মহাদেবের দল আসিয়া আসরে বসিল, কিন্তু নোটনদাসের সন্ধান মিলিল না । যে লোকটি নোটনকে ডাকিতে গিয়াছিল, সে ফিরিয়া আসিয়া বলিল— বাসাতে কেউ কোথাও নাই মশায়— লোক না— জন না— জিনিস না, পত্তর না— সব ভোঁ ভোঁ করছে । কেবল শতরঞ্জিটা পড়ে রয়েছে— যেটা আমরা দিয়েছিলাম ।

শুনিয়া মেলার কর্তৃপক্ষ স্তম্ভিত এবং কিংকর্তব্যবিমূঢ় হইয়া গেল ।
লোকেরা হইহই করিয়া গোলমাল করিয়া উঠিল ।

* * *

কাজটা যে ঘোরতর অন্যায় হইয়াছে তাহাতে সন্দেহ নাই । তবু বলিতে হইবে
যে নোটনদাসের দোষ নাই । গতবার হইতেই তাহার টাকা পাওনা ছিল ।
গতবার মেলা-তহবিলে টাকার অনটন পড়িয়াছিল, সেই জন্য চামুণ্ডার মোহন্ত
তাহাদের মাথায় বিল্বপত্র দিয়া আশীর্বাদ করিয়া বলিয়াছিলেন— আসছে বার ।
বাবা সকল, আসছে বার । আসছে বার গাওনার আগেই তোমাদের দু'বছরের
টাকা মিটিয়ে দেওয়া হবে ।

নোটন এবং মহাদেব বহুদিন হইতেই এ মেলায় গাওনা করে, এককালে
এ মেলার সমৃদ্ধির সময় তাহারা পাইয়াছেও যথেষ্ট, সেই কৃতজ্ঞতা বা
চক্ষুলাজ্ঞাতেই গতবার তাহারা কিছু বলিতে পারে নাই । কিন্তু এবার আসিয়া
নোটন যখন মোহন্তকে প্রণাম করিয়া হাত পাতিয়া দাড়াইল, তখনও তিনি
টাকার পরিবর্তে তাহার হাতে দিলেন তাজা টকটকে একটি জবা ফুল, এবং
আশীর্বাদ করিলেন— বেঁচে থাক বাবা, মঙ্গল হোক ।

বলিয়াই তিনি প্রসঙ্গান্তরে মনোনিবেশ করিলেন । লোকজন অনেকেই
সেখানে বসিয়া ছিল— অধিকাংশই গ্রামের ভদ্রলোক, তাহাদের সঙ্গেই প্রসঙ্গটা
আগে হইতে চলিতেছিল । নোটন প্রসঙ্গটা শেষ হইবার অপেক্ষায় বসিয়া
রহিল । মজলিসে আলোচনা হইতেছিল— মেলার এবং মা চামুণ্ডার স্থানের
আয়ব্যয় লইয়া । মোহন্ত আয় এবং ব্যয়ের হিসাব সবিস্তারে বিবৃত করিয়া
সিদ্ধান্ত করিয়া দিলেন যে, মা চামুণ্ডার হ্যাণ্ডনোট না কাটিলে আর উপায় নাই ।
পরিশেষে মৃদু হাসিয়া বলিলেন— দাও না, তোমরা কেউ টাকা ধার দাও না
বাবা! দেখ এমন খাতক আর মিলবে না । এ খাতকের কুবের খাজাঞ্চি । ধর্মের
কাগজে কামনার কালিতে হ্যাণ্ডনোট লিখে নিয়ে অর্থ দিলে— ওপারে
মোক্ষসুদ সমেত পরমার্থ কড়ায় গণ্ডায় মিটিয়ে পাবে । বলিয়া হা-হা করিয়া
হাসিয়া উঠিলেন । সঙ্গে সঙ্গে সকলেই হাসিল । নোটনদাসও হাসিল । তবে সে
বুদ্ধিমান । সুতরাং তারপরেই মজলিস হইতে সরিয়া পড়িল ।

নোটনের বাসায় তখন নূতন একটা বায়না আসিয়া তাহার প্রতীক্ষা
করিতেছিল । এখান হইতে দশ ক্রোশ দূরে একটা মেলা বসিতেছে, সেখানে
এবার প্রচুর সমারোহ, তাহারা কবিগানের আসরে নোটনদাসকে পাইবার জন্য
লোক পাঠাইয়াছে । অন্তত এখানকার মেলায় গাওনা শেষ করিয়াও যাইতে

হইবে। আর যদি এখানে কোনোরকমে শেষের দিনের গাওনাটা না গাহিয়া আগেই যাইতে পারে তাহা হইলে তো কথাই নাই। সেক্ষেত্রে দক্ষিণার কাঞ্চনমূল্যও ওজনে ভারী হইবে।

নোটন হাত জোড় করিয়া কপালে ঠেকাইয়া বলিল— জয় মা চামুণ্ডা। তারপর সে তাহার দোহারকে বলিল— বোতলটা দে তো। বোতল না হইলে নোটনের চলে না। বোতলের মুখেই খানিকটা পানীয় পান করিয়া নোটন গা-বাড়া দিয়া বসিল।

লোকটি নোটনের মুখের দিকে চাহিয়া বসিয়া ছিল, সে বলিল— তা হলে ওস্তাদ, আমাকে একটা কথা বলে দেন। আমাকে আবার এই ট্রেনেই ফিরতে হবে। ট্রেনের তো আর দেরি নাই।

নোটন হাসিয়া বলিল— আমি যদি কাল থেকেই গাওনা করি?

লোকটা বিস্মিত ও চিন্তিত হইয়া বলিল— আজ্ঞে, তা হলে এখানকার কী হবে?

নোটন বলিল— নিজে শুতে পাচ্ছিঁস সেই ভালো, শঙ্করার ভাবনা ভাবতে হবে না। তোকে। আমি তা হলে টাকা কিন্তু বেশি নোব।

লোকটা সোৎসাহে বলিল— আচ্ছা বেশ। তা কবে যাবেন আপনি?

— আজই। এখুনি। তোর সঙ্গে। এই ট্রেনে।

লোকটা উৎসাহিত হইয়া উঠিল।

— দক্ষিণে কিন্তু পনেরো টাকা রাত্রি।

— আজ্ঞে, তাই দোব। লোকটার উৎসাহের আর সীমা ছিল না।

— কিন্তু আগাম দিতে হবে।

তৎক্ষণাৎ লোকটি একখানা দশ টাকার নোট বাহির করিয়া দিল। বলিল— এই বায়না। আর সেখানকার মাটিতে পা দিলেই বাকি টাকা কড়াক্রান্তি হিসেব করে মিটিয়ে দোব।

নোটখানা ট্যাকে গুঁজিয়া নোটন উঠিয়া পড়িল। ঢুলি ও দোহারদের বলিল— ওঠো! লোকটাকে বলিল— টাকা মিটিয়ে নিয়ে বাসায় ঢুকব কিন্তু। তারপর সন্ধ্যার অন্ধকারে অন্ধকারে মাঠে মাঠে স্টেশনে আসিয়া মুখ ঢাকিয়া ট্রেনে উঠিয়া বসিয়াছে। এবং সে ট্রেনও চলিয়া গিয়াছে। ঘটনার এই শেষ।

* * *

নোটন ভাগিয়াছে শুনিয়া অপর পাল্লাদার কবি মহাদেব আসরে বসিয়া মনে মনে আফসোস করিতেছিল। আজও পর্যন্ত নোটনের সহিত পাল্লায় কখনো সে

পরাজয় স্বীকার করে নাই, কিন্তু আজ সে সর্বান্তঃকরণে নীরবে পরাজয় স্বীকার করিল— সঙ্গে সঙ্গে নোটনকে বেইমান বলিয়া গালও দিল। তাহাকে বলিলে কি সেও যাইত না!

আসরের জনতা ক্রমশ ধৈর্য হারাইয়া ফেলিতেছিল, সংবাদটা তখনও তাহাদের কাছে পরিস্কার হয় নাই। অধীর শ্রোতার দল কলরবে একেবারে হাট বাধাইয়া তুলিয়াছে। অন্যদিকে একপাশে মেলার কর্তৃপক্ষ এবং গ্রাম্য জমিদারগণ নোটন-প্রসঙ্গ আলোচনা করিতেছিলেন। মোহন্ত চিন্তিতভাবে দাড়িতে হাত বুলাইতেছেন। মধ্যে বলিতেছেন— তারা, তারা!

নোটন ভাগিয়াছে, কবিগান হইবে না— এই কথাটি একবার উচ্চারিত হইলে হয়, সঙ্গে সঙ্গে এই দর্শকদল বাঁধভাঙা জলাশয়ের জলের মতো চারিদিকে ছড়াইয়া পড়িবে। জলশূন্য পুষ্করিণীর ভিজা পাঁকের মতো জনশূন্য মেলাটায় থাকিবে শুধু পায়ের দাগ আর ধুলা।

ওদিকে আর একদল গ্রাম্য জমিদার একেবারে খড়ের আঙনের মতো জ্বলিয়া উঠিয়াছে। এখনই পাইক লাঠিয়াল ভেজিয়া গলায় গামছা বাঁধিয়া নোটনকে ধরিয়া আনিয়া জুতা মারিয়া পিঠের চামড়া তুলিয়া দিবার ব্যবস্থা হইতে ক্ষতিপূরণের মামলা করিয়া হতভাগ্যের ভিটামাটি উচ্ছন্ন দিবার ব্যবস্থা পর্যন্ত— নানা উদ্বেজিত কল্পনায় তৃণদাহী বহির মতোই তাহারা লেলিহান হইয়া জ্বলিতেছে। এই জমিদারদের অন্যতম, গঞ্জিকাসেবী ভূতনাথ— নামে ভূতনাথ হইলেও দক্ষযজ্ঞনাশী বিরূপাক্ষের মতোই সে দুর্মদ ও দুর্দান্ত— সে হঠাৎ মালকোঁচা সাঁটিয়া লাফাইয়া উঠিল। বলিল— দুটো লোক। বলিয়া দুইটা আঙুল তুলিয়া ধরিল। কিছুক্ষণ থামিয়া থাকিয়া বলিল— দোঠো আদমি হামারা সাথ দেও, হাম আভি যায়গা। দশ কোশ রাস্তা। আরে দশ কোশ তো দুলকিমে চলা যায়গা। বলিয়া সে যেন দুলকি চালে চলিবার জন্য দুলিতে আরম্ভ করিল।

ঠিক এই সময়েই কে একজন কথাটা জানিয়া ফেলিয়া আসরের প্রান্ত হইতে হাঁকিয়া উঠিল— উঠে আয় রে রাখহরি, উঠে আয়।

— কেন রে? উঠে গেলে আর জায়গা থাকবে না।

— জায়গা নিয়ে ধুয়ে খাবি? উঠে আয়— বাড়ি যাই— ভাত খাই গিয়ে।

ওরে নোটনদাস ভাগলবা, পালিয়েছে। কবি হবে না।

— না। মিছে কথা।

— মাইরি বলছি। সত্যি।

রাখহরি রসিক ব্যক্তি, সে সঙ্গে সঙ্গে বলিয়া উঠিল— বলো হরি— ! সমগ্র জনতা নিম্নাভিমুখী আলোড়িত জরলাশির কল্লোলের মতোই কৌতুকে উচ্ছ্বসিত হইয়া ধ্বনি দিয়া উঠিল— হরি বো—ল । অর্থাৎ মেলাটির শবযাত্রা ঘোষণা করিয়া দিল । সঙ্গে সঙ্গে তৃণদাহী বহি যেন ঘরে লাগিয়া গেল । জমিদারবর্গ জনতার উপরেই ক্ষিপ্ত হইয়া উঠিল ।

— কে? কে? কে রে ব্যাটা?

— ধর তো ব্যাটাকে, ধর তো! হারামজাদা বজ্জাত, ধর তো ব্যাটাকে!

ভূতনাথ ব্যাঘ্রবিক্রমে ঘুরিয়া রাখহরির বদলে যে লোকটিকে সম্মুখে পাইল, তাহারই চুলের মুঠায় ধরিয়া হুংকার দিয়া উঠিল— চোপ রও শালা!

অন্য কয়েকজনে তাহাকে ক্ষান্ত করিল— হাঁ-হাঁ-হাঁ! করো কী ভূতনাথ, ছাড়ো, ছাড়ো । ও রাখহরি নয় ।

ভূতনাথ তাহাকে ছাড়িয়া দিল, কিন্তু বীরবিক্রমে শাসন করিয়া দিল— খবর-দা-র!

একজন বিবেচক ব্যক্তি বলল— মেলা-খেলায় ও-রকম করে মানুষ । রং তামাশা নিয়েই তো মেলা হে । ভোলা ময়রা কবিয়াল— জাড়া গাঁয়ে কবি গাইতে গিয়ে জমিদারের মুখের সামনেই বলেছিল— “কী করে তুই বললি জগা, জাড়া গোলক বৃন্দাবন, যেখানে বামুন রাজা চাষি প্রজা— চারদিকেতে বাঁশের বন! কোথায় বা তোর শ্যামকুণ্ড কোথায় বা তোর রাধাকুণ্ড— সামনে আছে মুলোকুণ্ড করগে মুলো দরশন ।” তাতে তো বাবুরা রাগ করে নাই খুশিই হয়েছিল ।

ভূতনাথ এত বোঝে না, সে বজ্জাকে এক কথায় নাকচ করিয়া দিল— যা যাঃ! কীসে আর কীসে— ধানে আর তুষে ।

— আরে, তুষ হলেও তো ধানের খোসা বটে । চটলে চলবে কেন? দু-তিন মাইল থেকে সব তামাক টিকে নিয়ে এসেছে কবিগান শুনতে । এখন শুনছে— ‘কবিয়াল ভাগলবা’; তা ঠাট্টা করে একটু হরিধ্বনি দেবে না? রেগো না ।

মোহন্ত এখন মোহান্ত হইয়াছেন বটে, কিন্তু এককালে তিনি একজন পাকা পাটোয়ার অর্থাৎ জমিদার — সেরেস্তার কূটবুদ্ধি নায়েব ছিলেন । গাঁজা তিনি চিরকালই খান । তিনি এতক্ষণ ধরিয়া নীরবে কবিগানের কথাই চিন্তা করিতেছিলেন । তিনি হঠাৎ বলিয়া উঠিলেন আচ্ছা, আচ্ছা, তাঁর কবিগানই হবে । চিন্তা কী তার জন্যে? চিন্তামণি যে পাগলি বেটির দরবারে বাঁধা তাঁর

চিনির ভাবনা! বলিয়া হা-হা করিয়া হাসিয়া উঠিলেন হইয়াছে, চিনির সন্ধান মিলিয়াছে ।

কবিগান চিনি কি না— সে প্রশ্ন তখন কাহারও মনে উঠিবার কথাও নয় সময়ও নয় । সুতরাং সে প্রশ্ন না করিয়া সকলে উৎসুক দৃষ্টিতে মোহন্তের মুখের দিকে চাহিল ।

মোহন্ত বলিলেন— ডাক মহাদেবকে আর তার প্রধান দোয়ারকে । অতঃপর ঘাড় নাড়িতে নাড়িতে বলিলেন— তাই হোক— গুরু-শিষ্যেই যুদ্ধ হোক । রাম-রাবণের যুদ্ধের চেয়ে দ্রোণ-অর্জুনের যুদ্ধ কম নয় । রামায়ণ সপ্তকাণ্ড, মহাভারত হলো অষ্টাদশ পর্ব ।

শোরগোল উঠিল— মহাদেব! মহাদেব! ওহে করিবয়াল! ওস্তাদজি হে, শোনো শোনো ।

দুই

দায়ে পড়িয়া মহাদেব প্রস্তাবটায় সম্মতি না দিয়া পারিল না ।

মোহন্ত সুদূর্লভ আশীর্বাদ করিয়া তাহাকে কল্পতরুর তলায় বসাইয়া দিলেন এবং চারিদিকে প্রমত্ত জনতা । অতঃপর সম্মত না হইয়া উপায় কী! কিম্ব আর একজন তুলি ও দোয়ারের প্রয়োজন । ঠিক এই সময়েই নিতাইচরণের আবির্ভাব । সে জোড়হাতে পরম বিনয়সহকারে শুদ্ধ ভাষায় নিবেদন করিল— প্রভু, অধীনের একটি নিবেদন আছে— আপনাদের সি-চরণে ।

অন্য কেহ কিছু বলিবার পূর্বেই মহাদেব কবিয়ালই বলিয়া উঠিল— এই যে, এই যে আমাদের নেতাইচরণ রয়েছে; তবে আর ভাবনা কী? নেতাই বেশ পারবে দোয়ারকি করতে । কিরে, পারবি না ।

নিতাইয়ের গুণাগুণ কবিয়ালরা জানিত, কবিগান যেখানেই হউক, সে গিয়া ওই দোয়ারদের দলে মিশিয়া বসিয়া পড়িত । কখনো কাঁসি বাজাইত— আর দোয়ারের কাজে তো প্রথম হইতে শেষ পর্যন্ত বেগার দিয়া যাইত ।

বাবুদলের মধ্যে একজন কলিকাতায় চাকরি করেন, ময়লা কাপড়-জামার গাদার মধ্যে তিনি ধোপদুরন্ত পাট করা বস্ত্রের মতোই শোভমান ছিলেন । চালটিও তাঁহার বেশ ভারিক্কি, তিনি খুব উঁচুদরের পায়ভারী পৃষ্ঠপোষকের মতো করুণামিশ্রিত বিস্ময় প্রকাশ করিয়া বলিলেন— বলো কী, অঁ্যা? নেতাইচরণের আমাদের এত গুণ! A poet! বাহবা, বাহবা রে নিতাই । তা লেগে যারে ব্যাটা, লেগে যা । আর দেরি নয়— আরম্ভ করে দাও তা হলে । তিনি হাতঘড়িটা দেখিবার চেষ্টা করিয়া বলিলেন— এখনই তো তোমার— ! কটা বাজল?

কে একজন ফস করিয়া দেশলাইয়ের একটা কাঠি জ্বালিয়া আগাইয়া ধরিল ।

ভদ্রলোক বিরক্ত হইয়া হাতটা সরাইয়া লইয়া বলিলেন— আ! দরকার নেই আলোর। রেডিয়াম দেওয়া আছে, অন্ধকারে দেখা যাবে।

ভূতনাথ এতসব রেডিয়াম-ফেডিয়ামের ধার ধারে না, সে হি-হি করিয়া হাসিয়া নিতাইকেই বলিল— লেরে ব্যাটা, লে; তাই কাক কেটেই আজ অমাবস্যে হোক। কাক— কাকই সই! তোর গানই শুনি!

নিতাই মনে মনে আহত হইলেও মুখে কিছু বলিল না। ওদিকে তখন আসরে ঢোলে কাঠি পড়িতে আরম্ভ করিয়াছে, কুডু— তাক কুডু— তাক কুডু— ম-কুডুম।

নিতাই দোয়ারকি করিতে লাগিয়া গেল।

আপন দোয়ারের সহিত কবিওয়ালার কবিগানের পান্না। সুতরাং পান্না বা প্রতিযোগিতাটা হইতেছিল আপসমূলক— অত্যন্ত ঠান্ডা রকমের। তীব্রতা অথবা উষ্ণতা মোটেই সঞ্চারিত হইতেছিল না। শ্রোতাদের মধ্যে গুঞ্জন উঠিল দুই ধরনের। যাহারা উহাদের মধ্যে তীক্ষ্ণবুদ্ধি, তাহারা বলিল— দূর দূর! ভিজে ভাতের মতো গান। এই শোনে! সাঁট করে পান্না হচ্ছে! চল বাড়ি যাই। দুই-চারজন আবার উঠিয়াও গেল।

অপর দল বলিল— মহাদেবের দোয়ারও বেশ ভালো কবিরাল মাইরি! বেশ কবিরাল, ভালো কবিরাল। টকাটক জবাব দিচ্ছে।

নিতাইচরণের প্রশংসাও হইতেছিল। প্রশংসা পাইবার মতো নিতাইচরণের মূলধন আছে। তাহার গলাখানি বড় ভালো। তাহার উপর ফোড়নও দিতেছে চমৎকার। মহাদেবের দোয়ারকে পিছনে ফেলিয়া নিজে স্বাধীনভাবে দু-চার কলি গাহিবার জন্য সে প্রাণপণে চেষ্টা করিতেছে।

বাবুরা ইহাতে তাহাকে উৎসাহ দিলেন— বলিহারি ব্যাটা, বলিহারি! বলিহারি!

নিতাইয়ের স্বজন ও বন্ধুজনে বলিল— আচ্ছা, আচ্ছা!

এক কোণে মেয়েদের জটলা। এ মেয়েরা সবই ব্রাত্য সমাজের। তাহাদেরও বিস্ময়ের সীমা নাই, নিতাইয়ের পরম বন্ধু স্টেশনের পয়েন্টসম্যান রাজালাল বায়েনের বউ হাসিয়া প্রায় গড়াইয়া পড়িতেছে— ও মা গো। নেতাইয়ের প্যাটে প্যাটে এত! ও মা গো!

তাহার পাশেই বসিয়া রাজার বউয়ের বোন, ষোলো-সতেরো বছরের মেয়েটি, পাশের গ্রামের বউ— সে বিস্ময়ে হতবাক হইয়া গিয়াছে, সে মধ্যে মধ্যে বিরক্ত হইয়া বলিতেছে— না ভাই, খালি হাসচিস তু। শোন কেনে।

রাজা বন্ধু-গৌরবে অদূরে বসিয়া ক্রমাগত দুলিতেছিল, সে হাসিয়া বলিল— দেখতা হ্যায় ঠাকুরঝি? ওস্তাদ কেয়সা গান করতা হ্যায়, দেখতা?

রাজা এই শ্যালিকাটিকে বলে— ঠাকুরঝি! নিতাইও তাহাকে বলে— ঠাকুরঝি। শ্বশুরবাড়ি অর্থাৎ পাশের গ্রাম হইতে সে নিত্য দুধ বেচিতে আসে। নিতাই নিজেও তাহার কাছে এক পোয়া করিয়া দুধের 'রোজ' লইয়া থাকে। এই কারণেই মেয়েটির বিস্ময় এত বেশি। যে লোককে মানুষ চেনে, তাহার মধ্য হইতে অকস্মাৎ এক অপরিচিতজনকে আত্মপ্রকাশ করিতে দেখিলে বিস্ময়ে মানুষ এমনই হতবাক হইয়া যায়।

নিতাইয়ের কিন্তু তখন এদিকে চাহিয়া দেখিবার অবসর ছিল না। সে তখন প্রচণ্ড উৎসাহে উৎসাহিত হইয়া উঠিয়াছে, উৎসাহের প্রাবল্যে সে গল্পের উটের মতো নাসিকা-প্রবেশের পথে মাথা গলাইয়া দিল। এবং নিজেই সে স্বাধীনভাবে গান আরম্ভ করিল। আ—করিয়া রাগিণী টানিয়া মহাদেবের দোয়ারের রচিত ধুয়াটাকে পর্যন্ত পালটাইয়া দিয়া সেই সুরে ছন্দে নিজেই নূতন ধুয়া ধরিয়া দিল। এবং নিজের সুন্দর কণ্ঠের প্রসাদে তাহাকে সঙ্গে সঙ্গে প্রতিষ্ঠিত করিয়াও ফেলিল।

মহাদেবের দোয়ার সে-ই প্রকৃত একপক্ষের পাল্লাদার ওস্তাদ। সে আপত্তি তুলিয়া বলিয়া উঠিল— অ্যাই! ও কী? ও কী গাইছ তুমি। অ্যাই— নেতাই! অ্যাই!

নিতাই সে কথা গ্রাহ্যই করিল না। বাঁ হাতখানিতে কান ঢাকিয়া ডান হাতখানি থুতু নিবারণের জন্য মুখের সম্মুখে ধরিয়া গান গাহিয়াই চলিল। সম্মুখের দিকে অল্প একটু ঝুকিয়া তালে তালে মৃদু নাচিতে নাচিতে সে তখন গাহিতেছিল—

হুজুর— ভদ পঞ্চজন রয়েছে যখন

সুবিচার হবে নিশ্চয় তখন—

জানি জানি—

বাবুরা খুব বাহবা দিলেন— বহুত আচ্ছা! বাহবা বাহবা! নেতাই বলছে ভালো!

সাধারণ শ্রোতারাও বলিল— ভালো। ভালো। ভালো হে।

নিতাই ঠাঁ করিয়া লাফ মারিয়া ঘুরিয়া ঢুলিটাকে ধমক দিয়া বলিল— অ্যা-ই কাটছে। সঙ্গে সঙ্গে সে তাল দেখাইয়া হাতে তালি দিয়া বাজনার বোল বলিতে আরম্ভ করিল— ধিকড় তা-তা-ধেনতা— তা-তা- ধেনতা— গুড়-তা-

তা-থিয়া— ঝিকড়;— হাঁ— ! বলিয়া সে তাহার নূতন স্বরচিত ধূয়াটায় ফিরিয়া আসিল—

ক-য়ে কালী কপালিনী— থ-য়ে খপ্পরধারিণী
গ-য়ে গোমাতা সুরভি— গণেশজননী—
কণ্ঠে দাও মা বাণী ।

একপাশে কতকগুলি অর্ধশিক্ষিত ছোকরা বসিয়া ছিল— তাহারা হি-হি করিয়া হাসিয়া উঠিল । একজন বলিল— গ-য়ে গরু, ছ-য়ে ছাগল, ভ-য়ে ভেড়া । বহুত আচ্ছা!

হাস্যধ্বনির রোল উঠিয়া গেল ।

নিতাই সঙ্গে সঙ্গে খাড়া দাঁড়াইল, তারপর হাস্যধ্বনি অল্প শান্ত হইতেই বলিল— বলি দোয়ারগণ!

মহাদেবের দোয়ার রাগ করিয়া বসিয়া ছিল, অপর কোনো দোয়ারও ছিল না । কেহই সাড়া দিল না । নিতাইও উত্তরের প্রত্যাশা না করিয়াই বলিল— দোয়ারগণ! গোমাতা শুনে সবাই হাসছে । বলছে, গ-য়ে গরু, ছ-য়ে ছাগল, ভ-য়ে ভেড়া!

তুলিটা এবার বলিল — হ্যাঁ ।

— আচ্ছা ।— বলিয়া সে ছড়ার সুরে আরম্ভ করিল—

গো-মাতা শুনিয়া সবে হাস্য করে ।

দীন নিতাইচরণ বলছে জোড়করে—

বলিয়া হাত দুইটি জোড় করিয়া একবার চারিদিক ঘুরিয়া লইল । বন্ধু রাজা পরম উৎসাহে বলিয়া উঠিল— বহুত আচ্ছা ওস্তাদ ।

কিন্তু নিতাই তখন চোখে স্পষ্ট করিয়া কিছু দেখিতেছিল না, রাজাকেও সে লক্ষ করিল না, সে আপন মনে ছড়াতেই বলিয়া গেল ।

শুনুন মহাশয় দীনের নিবেদন ।
গো কিংবা গরু তুচ্ছ নয় কখন ॥
গাভি ভগবতী, ষাঁড় শিবের বাহন ।
সুরভির শাপে মজে কত রাজন ॥

রব উঠিল— ভালো! ভালো! তুলিটা ঢোলে কাঠি দিল— ডুডুম!

নিতাই বলিল—

শাস্ত্রের সার কথা আরও বলে যাই ।
গো-ধন তুল্য ধন ভূ-ভারতে নাই ॥

তেই গোলকপতি—বিষু বনমালি ।
ব্রজধামে করলেন গরুর রাখালি ॥

নিতাইয়ের এই উপস্থিত জবাবে সকলে অবাক হইয়া গেল । ছন্দে বাঁধিয়া এমন ত্বরিত এবং যুক্তিসম্পন্ন জবাব দেওয়া তো সহজ কথা নয় । বন্ধু রাজা পর্যন্ত হতবাক; রাজার বউয়ের হাসি থামিয়া গিয়াছে, ঠাকুরঝির অবগুষ্ঠন খসিয়া পড়িয়াছে— দেহের বেশবাসও অসম্মত ।

নিতাইয়ের তখনও শেষ হয় নাই, সে বলিল—

তা ছাড়া মশাই—আছে আরও মানে—
গো মানে পৃথিবী শুধান পণ্ডিত জনে॥

এবার বাবুরাও উচ্ছ্বসিত প্রশংসা করিয়া উঠিলেন । আসরের লোকেরা হরিধ্বনি দিয়া উঠিল ।

নিতাই বিজয়গর্বে তুলিটাকে বলিল— বাজাও ।

এতক্ষণে সকলে নড়িয়া চড়িয়া বসিল, রাজা একবার ফিরিয়া স্ত্রী ও ঠাকুরঝির দিকে চাহিয়া হাসিল— অর্থাৎ, দেখ! স্ত্রী বিস্ময়ে মুগ্ধ হাসি হাসিয়া বলিল— তা বটে বাপু ।

তরুণী ঠাকুরঝিটির কিম্ব তখনও বিস্ময়ের ঘোর কাটে নাই । সে বিপুল বিস্ময়ে শিথিলচৈতন্যের মতো নিতাইয়ের দিকে চাহিয়া ছিল । রাজা তাহার অসম্মতবাস বিস্মিত ভঙ্গি দেখিয়া বিরক্ত হইয়া উঠিল, রুচস্বরে বলিল— অ্যাই! ও ঠাকুরঝি, মাথায় কাপড় দে!

রাজার স্ত্রী একটা ঠ্যালা দিয়া বলিল— মরণ, সাড় নাই মেয়ের!

ঠাকুরঝি এবার জিভ কাটিয়া কাপড় টানিয়া মাথায় দিয়া বলিল— আচ্ছা গাইছে বাপু ওস্তাদ ।

ওদিকে বাবুদের মহলেও বিস্ময়ের সীমা ছিল না । সেই কলিকাতা-প্রবাসী চাকুরে বাবুটি পর্যন্ত স্বীকার করিলেন— Yes । এ রীতিমতো একটা বিস্ময়! Son of a Don— অ্যা — He is a poet!

দূর্দান্ত ভূতনাথ হইলে রুদ্র, তুষ্ট হইলে আশুতোষ— মানসিক অবস্থার এই দুই দূরতম প্রান্তে অতি সহজেই সে গঞ্জিকাপ্রসাদে ব্যোমমার্গে নিমেষমধ্যেই যাওয়া-আসা করিয়া থাকে, সে একেবারে মুগ্ধ হইয়া গিয়াছিল । সে বলিল— ধুকুড়ির ভেতর খাসা চালরে বাবা! রত্নরে— একটা রত্ন— মানিকের ব্যাটা মানিক! বলিহারি রে!

মোহন্ত হাসিয়া বলিলেন— আমার পাগলি বেটির খেয়াল বাবা; নিতাইকে বড় করতে মা আমার নোটনকে তাড়িয়েছেন ।

ইহার পরই আরম্ভ হইল মহাদেবের পালা । মহাদেব পাকা প্রাচীন কবিয়াল । ব্যাপারটা দেখিয়া শুনিয়া সে ব্রুদ্ধ ভ্রুকুটি করিয়া গান ধরিল— ব্যঙ্গ, রঙ্গ, গালিগালাজে নিতাইকে শূলবিদ্ধ করিয়া তিলে তিলে বধ করিতে আরম্ভ করিল । তাহার সরস, অশ্লীলতা-ঘেঁষা গালিগালাজে সমস্ত আসরটা হাস্যরসে মুখর হইয়া উঠিল । নিতাই আসরে বসিয়া মৃদু মৃদু হাসিতেছিল, এবং মনে মনে গালিগালাজের জবাব খুঁজিতেছিল ।

কিন্তু ক্ষুণ্ণ হইল রাজা । সে মিলিটারি মেজাজের লোক, বন্ধুকে গালিগালাজগুলো তাহার অসহ্য হইয়া উঠিল । সে আসর হইতে উঠিয়া খানিকটা মেলার মধ্যে ঘুরিবার জন্য চলিয়া গেল । রাজার স্ত্রী প্রচুর হাসিতেছিল । ঠাকুরঝি মেয়েটি কিন্তু অত্যন্ত দুঃখিত হইয়াছে, সেও এবার বিরক্তিতে বলিল— হাসিস না দিদি! এমনি করে গাল দেয় মানুষকে!

মহাদেব ছড়া বলিতেছিল ।

সুবুদ্ধি ডোমের পোয়ের কুবুদ্ধি ধরিল ।
ডোম কাটারি ফেলে দিয়ে কবি করতে আইল ॥
ও-ব্যাটার বাবা ছিল সিঁদেল চোর, কর্তা-বাবা ঠাণ্ডাড়ে ।
মাতামহ ডাকাত ব্যাটার— দ্বীপান্তরে মরে
সেই বংশের ছেলে ব্যাটা কবি করবি তুই ।
ডোমের ছাওয়াল রত্নাকর, চিংড়ির পোনা রুই ॥

একজন ফোড়ন দিল—

অল্প জলই ভালো চিংড়ির— বেশি জলে যাস না—

দোয়ারের পরমোৎসাহে মহাদেবের নূতন ধুয়াটা গাছিল—

আঁস্তাকুড়ের এঁটোপাতা— স্বগগে যাবার আশা— গো!
ফরাৎ করে উড়ল পাতা— স্বগগে যাবার আশা গো ॥
হায় রে কলি— কীই বা বলি—
গরুড় হবেন মশা গো— স্বগগে যাবার আশা গো ॥

অকস্মাৎ মহাদেব বলিয়া উঠিল— আঁঃ, জ্বালাতন রে বাপু! বলিয়াই সে আপনার পায়ে একটা চড় মারিয়া বসিল এবং সঙ্গে সঙ্গে গাছিল—

পায়েতে কামড়ায় মশা— মারিলাম চাপড়
গোলকেতে বিষু কাঁদেন— চড়িবেন কার উপর!